

PASIAN KHUO-LE-TUI

Ephesa 2:19

Thumapui: Sepguol thupite nua etkiana:

a) Pawtdoh a ngai hi:

- # Adam a umna ding mun Pasian hopina a aumlou zieh in Pasian in “Adam hei a um na hiei” chiin ahan hi.
- Pasian khuo-le-tui hina ding in i umna/Setan gam apat pawtkhie a, Pasian in i umna ding a a deina mun a um a ngai hi.
- # Abraham in Pasian khup-le-tui hina a tan theina “Na gam leh na tanaute leh na pa innsung a kipat pawt in” chiin Pasian in a hankhie hi.
- Pasian khuo-le-tui hitheina ding in i pa (gul suonte aw a chi bang in) setan deinate nuasie a poimaw hi.
- # Abraham khu Pasian khuo-le-tui ahizieh in Pasian in Sodom leh Gomorah a suhsiet ding in a na thei a, avaitun hi. Tualeh Pasian in zong a sil bawl ding khu a phuo, theisih a, Abraham a theisah teitei a, tualeh a ngetna zong a lemsahpita hi.
- Pasian toh zawhkhawm a, Pasian khuo-le-tui khat ihileh Mangpa deilam i thei ding ua, Ama i mu apat i hasuo sih ding uhi.
- # Lot zong Pasian khuo-le-tui ahia, Pasian a thei zieh in Sodom leh Gomorah suse dingte khu Pasian mite ahi uh chi a thei pai a, na del in a vaidawn a a inn a tung ding in a zawl paupau hi (Gen. 19:1-3).
- # Tualeh muol tung a tai ding a hil ahi lai in zong Zoar khuo neu phaijang a pei ding in a ngen a, phalsah ahi nalai hi.
- # Johan 10:14-15 ah Kei belam chingpa hoi khu kahia, ka pan kei ang thei a, ken zong ka pa ka thei a, ka belamte ka thei a ka belamten zong ang thei uhi a hi chi.
- # II Korinth 6:17 “Tuazieh in alah ua kipat hing pawt unleh a tuom in um un, sil sienglou malmal khoi sih un Mangpan a chi hi.

- # Lot hoina zieh in aji leh a tanute hutkhiet in um nan uleh aji in Pasian mite thuhil leh a pasal um dan a zuilou zieh in suohta zou talou in chi khuom a suohta hi.
- # Lot tanute ni in zong Pasian ngah zoulou a, amau duthusam ana suh tangtun zieh un a Pa uh Pasian a ding a mi hoi hinanleh tulai mite buoipi mama nam “Moab leh Ammon mite suongtu ahisahta uhi.

b) *Pientha a ngai hi.*

- # Tui leh Hagau a pienthana.
- # Koi zong Khrist a a umleh silsiem tha ahita hi. Sil luiteng a beita a, ngai un a hing thata hi (II Kor. 5:17).
- # “Pienthana Hagau nanglou in, Tung zou sih vang vangam inn nuom” (Latha bu No. 140).
- Eden khelna toh vangam lut thei ahisih hi.
- # Gen. 21:9-13 “..... Tam suohnu leh atapa notdoh in; suohnu tapa in ka tapa Isaak gou a luopi theisih ding hi...”

c) *Hagau a hin a ngai hi.*

- # I Kor. 2:10-11 ... Pasian thugilte zong mihing lungsim ngaisut khu mihing sung a um hagau lounal koi ahiei a thei ding? Tua ma bang in Pasian hagau lounal koiman Pasian ngaisutte a theisih hi.
- Hagau a hinna neilou in Pasian toh zawhkhawm thei ahisih.

d) *Thutah a ding ngam*

- # Ephesa 6:14-16 Tuazieh in na kawng thutah a gah in, dihtatna awmphaw bul in, lemna khantan hoi kisahkhola khu na keng ua but in ding un chiin Pasian galvam bukim lah ah zong atel hi.
- Thutahna tellou Pasian in a ngai theisih hi.

e) *Hangtah leh hattah a hin*

- # Joshuo 1:9 ... Hattah leh hangtah in um in...
- Israelte Kanaan gam a lutna ding un hansanna a poimaw mama a, Pasian muong a hangsantah a i pan louleh Van gam in lut zousih ding uhi.
- Joshuo leh a lawiten Kanaan a galvil a a pei lai un hangsantah

a “Zou ding ihi Pasion in ahing umpi ding” chite Kanaan a lut ua, Pasion muonglou a zaute a lut sih uhi.

f) *Nichin Kross puoh ngai*

- # Luke 9:23 “... Mi koipou in a hing zui ut uleh ama leh ama kingaisah lou in nichin a Kross puo in hing zui heh.
- Jesun “Ahinna it mi in ahinna a taan ding a, kei zieh a ahinna mansuo in kumtawn hinna anei ding” a chi hi.
- Poster “**I damna ai in Lalpa damna ngai poimawh zawk rawh**”

g) *Itna nei ding*

- # II Kor. Itna khu a thupipen ahi. Pasion khuo-le-tui hina ding in itna a ngai hi. Mangpa ka it ichi a a thupiehte i zui sihleh zuou ahi.

h) *Thum mi hi ngai*

- # Thumna khu Hagau nah hu toh kibang ahi.
- # Jesun zong a nuajuite thum dan ding ana hil hi. Nasepte 10:2 ah Kornelia silpieh leh thumna a ngai poimaw a, a thum zing zieh in Pasion in a thumna dawng in ama leh a innkuonpiten Pasion thu a san theina ding un Pasion in lampi a siemsah hi.

i) *Sienthoua hinkhuo*

- # Ephesa 4:22-24 “Na nidang lai hindan ua, mihing lui, mi sol utna zihe a kise gawp deudeu hawhkhie unlen, na lungsim hagau uah atha in hing um unlen, mihing tha, dihtatna leh sienthoua a Pasion kibahpi a siem pen sil un”
- Sienthoua lou in koima Pa kung a tung theisih ding hi.

j) *Galkap hoi*

- # II Timothi 2:3-4 “Jesu Khrist galkap hoitah bang in hasatnate hing thuohpi in...”
- # “Kot kochiiah ah lut un, Vangam lutna kot khu a neu a...”
- Vangam khu nuomtah a lut thei ahisih hi.

k) *Piching hinkhuo*

- Mangpan pichingtah a hing ding in ahing dei hi.

l) Neupen hinkhuo

Mark 10:15-16 “Adihtah in ka hing hil ahi. Mi koipou naupang neute bang a Pasian gam kipahpi lou pouma asung ah a lut sih ding uhi.

m) Ginna toh Pasian gam lut

- Pasian gam lutlou in Pasian khuo-le-tui kihi theilou hi.
- Tenglut lou in koiman khuo-le-tui hina a nga theisih hi.
- Tu laitah VISA ngaituo hun laitah ahi.

n) Pasian khuo-le-tui

Ephesa 2:19 “Tuazieh in tu in vang mikhuol leh gamdang mi na hi nawnsih ua, misiengthoute toh khotuol khat leh Pasian innkuonte na hi zawta uhi.

Mikhuol/Gam dang mi

- a) Mikhuol in a zintunna innsung ah a sakhau chilou ah thuneina a neisih hi.
- b) Mikhuol khu a ut dandan in zong a ham ngamsih hi.
- c) Gam dang a hina dan.
- d) Inneite/Gam miten zalenna a nei bang uh mikhuol leh gam dang miten a nei theisih ua, a utna tapou uah zong a vah theisih uhi.
 - Kho tha khat a teng ding in i tenna khuo apat i pawtkhiet a ngai hi.
 - Abraham leh Lot in Pasian mite a thei bang un eite zong Pasian khuo-le-tui ihileh Pasian mite i thei ua, i it ding uh ahi hi.

Rom 8:29 “Aziehpen Pasian in a theilawhte ama tapa bang a um ding in a guotlawh a, a tapa khu unau tampite lah a, ta masapen ahing hi theina ding ahi.

- Lei kisiem masang a gawsa belamnou ahi.
- Achil in thu a um a, tua khu Pa toh a umkhawm a, tua thu khu Pasian ahi. Ama apat sil zousie siem ahia, ama a pat siemlou bangma a umsih hi.

@ **A SIMTHU SUT SIEM LENG AW**

= Latha bu 120

- Rev. Thangngur

- > Simlei in sum leh suongmantam,
A hoi chiin sui kimvel in;
Hinanleh a hoinan pielgal kaizou vawtlou,
Van hoina pielgal hing tanvah,
Khumi khu hi ka gen nuom.

A simthu sut siem leng aw khum van khu,
A hoi dan hil siem leng aw ka Mang lenna;
Michin in lung in hing gul van,
Van Inn ah hing lawikhawm diing.
- > Sietlei thupina leh hoina,
Ni tampi muolkhum zouta;
Hinanleh van hoinan,
Mi sang zatam bei nua'n;
Atha in hing hoita deudeu,
Khumi khu hi ka gen nuom.
- > Van Inn hoi thupi leh innsang,
Kot khu kun a lut ahi;
Aw Kalvari muol leh Bethlehem bawng-inn ah,
Jal diing leh Kross a puoh lai in,
Koi ahei Mang puon se diing.
- > Hambang vaina gam leh kana,
Bangchih chieng in a bei diei?
Aw vangam thupi leh.
Hoi gensenglou gam khu,
A nopna teng toh hing tung diing,
Mubang ngai huibang mau ing.
- # Tam leitung ah sana-dangka sui in hinna tanpha taan ngam
in i um ua, hinanleh vangam ahing tut theisih a, tomnou
kaal bou ahi.
- # Vangam khu taangtawn dai ahi.

Exo. 12:13 “Tuachiin sisan khu nou a ding in na umna innte uah chiemtena a hiding. Tua sisan ka mu chieng in ka hing peikan ding. Izipt gam ka gawtna na tung uah a tung sih ding hi.

- Pasian in a khuo-le-tui hiding a a chiemte Israelte khu Belamnou sisan in a chiemte a, tu hun in Pasian khu-le-tui hidingte khu Jesu sisan a chiemte ihi uhi.

- Johan 1:29 Johan in Jesu ama lam zuon a hing pei amu a, “En un Pasian Belam nou leitung khelna lamangpa khu.” achi hi.

Pasian khuo-le-tui hiding in Jesu sisan a tatsate ihita ua, tua sisan zal in Pasian khuo-le-tui mai hilou in Pasian tate ihita uhi.